

Goražde, 01.10.2009.godine  
Broj:433/09

**ZAPISNIK I ZAKLJUČCI SA ČETVRTE SJEDNICE  
PREDSJEDNIŠTVA SKUPŠTINE SAVEZA OPĆINA I GRADOVA  
FEDERACIJE BOSNE I HERCEGOVINE**

U Goraždu je dana 01.10.2009. godine održana Četvrta sjednica Predsjedništva Saveza općina i gradova Federacije Bosne i Hercegovine (u daljem tekstu: Savez).

Sjednici Predsjedništva Saveza prisustvovalo je **12** članova, i to:

1. Husejin Smajlović, načelnik Općine Zenica,
2. Muhamed Ramović, načelnik Općine Goražde,
3. Hasan Ajkunić, načelnik Općine Bugojno,
4. Ermin Hajder, načelnik Općine Bosanski Petrovac,
5. Salem Dedić, načelnik Općine Jablanica,
6. Rasim Omerović, načelnik Općine Kalesija
7. Luka Čelan, načelnik Općine Livno,
8. Vlado Alilović, načelnik Općine Vitez,
9. Hakija Osmić, načelnik Općine Zavidovići,
10. Dragana Salaković, stručni suradnik za lokalnu samoupravu (po ovlaštenju Gradonačelnika), Grad Sarajevo,
11. Smiljana Viteškić, Predsjedavajuća Općinskog vijeća Ilidža (po ovlaštenju načelnika), i
12. Boro Đolo, šef Odsjeka za obnovu i razvitak, Općina Široki Brijeg (po ovlaštenju načelnika).

Pored gore navedenih, sjednici su prisustvovali i: **gđa Vesna Travljanin**, Direktorica Saveza, **gđa Zlata Turkić**, viši saradnik za rad sa skupštinskim komisijama i institucijama vlasti, **g-din Edin Demirović**, stručni suradnik za lokalnu samoupravu, **gđa Selma Fišek**, saradnik za pravna pitanja, i **g-đica Šejla Hasić**, viši saradnik za projekte.

G-din Smajlović pozdravlja prisutne, zahvaljuje domaćinu na gostoprimstvu, te stavlja Dnevni red na glasanje.

**Dnevni red je jednoglasno usvojen.**

1. Usvajanje Zapisnika i Zaključaka sa Treće Vanredne sjednice Predsjedništva

**Zapisnik i Zaključci sa Treće Vanredne sjednice Predsjedništva su jednoglasno usvojeni.**

2. Aktivnosti Saveza u vezi sa Stand by aranžmanom i raspodjelom kreditnih sredstava MMF-a

Izjavitelac: g-din Husejin Smajlović, predsjednik Predsjedništva Skupštine Saveza

G-din Smajlović podsjeća prisutne sa zaključcima sa predhodne sjednice Predsjedništva po pitanju MMFa. Izvještava prisutne da je Stručna služba Saveza, kako je to i zaključeno, poslala pisma sa

zahtjevom za sastanak. Savez je zaprimio odgovor od g-dina Gavrića Grahovca u kojem je izrazio želju za održavanjem sastanka. Također, ured Premijera je telefonski potvrdio termin sastanka za 08.10.2009. godine, međutim sastanak je odgođen.

G-din Smajlović konstatuje da se lokalna zajednica na višem nivou vlasti uopće ne uzima u obzir. Lokalna zajednica jednostavno nije u fokusu. G-din Smajlović također naglašava da su upućena pisma svim kantonima u vezi sa raspodjelom sredstava iz Stand by. Savez je zaprimio odgovor od tri kantona koji sugerišu Savezu da se obrati Federaciji BiH kao zakonodavnom tijelu.

Gđa Travljanin naglašava da je do zakazivanja sastanka došlo nakon mnogobrojnih poziva Stručne službe Saveza i insistiranja da prime delegaciju Saveza. Do sada nema nikakvih instrukcija za jedinice lokalne samouprave po pitanju MMFa i Stand by aranžmana.

G-din Omerović konstatuje da je prva tranša sredstava stigla a općine će vraćati sredstva bez obzira na to da li će ih dobiti ili ne. Država će vraćati dug, a jedinice lokalne samouprave kao dio te države će osjetiti vraćanje duga kroz umanjena sredstva. Konstatuje da su jedinice lokalne samouprave na kraju lanca. Smatra da Savez treba biti agresivniji prema Vladi i Parlamentu. Mora se izvršiti pritisak. Također, konstatuje da je važno ko će predstavljati Savez po ovom i drugim pitanjima u Parlamentu. Smatra da ako to budu osobe koje nisu reprezentativne da se neće moći ništa postići. Predlaže da to bude Predsjednik Predsjedništva ili član Predsjedništva.

G-din Smajlović konstatuje da ne treba ništa da se shvata lično, te da je sve stvar politike i da treba smanjiti rizike.

G-din Hajder konstatuje da su se dobivena sredstva u Unsko-sanskom kantonu podijelila direktno mjesnim zajednicama. Trebalo bi zauzeti stav, bez obzira na političku orijentaciju. U kantonalnoj Skupštini su se dogovorili da direktno daju sredstva mjesnim zajednicama. Ovo predstavlja problem. Savez mora reagovati.

G-din Ajkunić pozdravlja sve prisutne. Konstatuje da Savez ima sistem koji funkcioniše. Sugerira da se i dalje nastave naponi da se delegacija Saveza sastane sa Premijerom FBiH, te Ministarstvom financija, pa čak i sa predstavnicima Parlamenta i MMFa. Ako općine uđu u novembar bez bilo kakvih instrukcija, teško je da će se moći nešto uraditi. U Interventnom zakonu ne piše šta je obaveza lokalnih zajednica. Svi imamo umanjene budžeta. Predlaže da se i sa Savezom opština i gradova Republike Srpske traži zajednički sastanak sa g-dinom Špirićem.

G-din Smajlović konstatuje da onaj ko uzima pare će preuzeti i obaveze iz Stand by aranžmana. Također, izvještava prisutne da su sredstva u visini od 35 miliona maraka u Republici Srpskoj raspodijeljena lokalnim zajednicama od strane Vlade.

G-din Dedić pozdravlja prisutne i zahvaljuje domaćinu na gostoprimstvu. Predlaže da se i dalje traži sastanak sa pomenutim stranama. Smatra da bi u delegaciji trebao biti i g-din Smajlović kao Predsjednik Predsjedništva.

G-din Smajlović se slaže da općine treba dovesti u istu poziciju kao i druge nivoe vlasti. G-din Grahovac je spreman da primi delegaciju Saveza zajedno sa ministrom Bevandom.

Gđa Travljanin konstatuje da je postavljeno važno pitanje metodologije rada Saveza. Slaže se da je Parlament i previše ozbiljna institucija da bi se sve pojedinačno rješavalo. Konstatuje da je svih 79 načelnika jednako u Savezu. Slaže se sa g-dinom Omerovićem da Predsjedništvo mora određivati predstavnike. Također, gđa Travljanin predstavlja gđu Snježanu Kapić, konsultanta Saveza po pitanju javnih finansija koju je Savez angažovao uz pomoć Svjetske Banke.

Gđa Kapić pozdravlja prisutne te daje sažetak trenutne situacije i problema u pogledu MMFa i Stand by aranžmana.

G-din Smajlović zahvaljuje gđi Kapić i konstatuje da i dalje treba istrajati.

G-din Alilović konstatuje da su općina isključene iz MMFa i da su prihodi dosta loši. Postavlja pitanje da li su općinama uopće isplativa ova sredstva od MMFa.

Gđa Solaković konstatuje da je cijeli proces potpuno netransparentan za jedinice lokalne samouprave što je kršenje elementarnih principa lokalne samouprave i po Zakonu o principima lokalne samouprave u FBiH i po Povelji o principima lokalne samouprave. Treba nastaviti razgovore a ako se ne dobiju zadovoljavajući odgovori treba se djelovati putem Ustavnog suda.

**Jednoglasno se usvaja zaključak da se i dalje nastave aktivnosti Saveza zadate tokom protekle sjednice Predsjedništva.**

### 3. Izvještaj Komisije za ustavna i zakonodavna pitanja

#### 3.1. Prijedlog Zakona o zaposlenicima u organima jedinica lokalne samouprave

Gđa Travljanin izvještava da je Prijedlog zakona upućen Ministarstvu i Parlamentu zajedno sa pismom. Sada je momenat lobiranja najvažniji. Potrebno je dogovoriti se o strategiji lobiranja. Ovaj zakon sistemski mijenja status uposlenih u jedinicama lokalne samouprave. Predsjedništvo je u toku šta se želi postići ovim Zakonom.

G-din Smajlović konstatuje da nije previše preopterećen kakav će stav biti zauzet povodom ovog pitanja. Bitno je da Ministarstvo pravde podržava ovaj Zakon.

G-din Omerović konstatuje da je primarno obrazloženje status uposlenika u RSu. U Federaciji službenici znaju da načelnik nema odgovornosti i nadležnosti. Sugerirše nekoliko manjih izmjena glede

procenta osnovice (čl. 49.) i procesa nagrađivanja. Potrebno je učiniti sve da ovaj zakon dođe na Dnevni red Parlamenta.

**Jednoglasno je usvojen zaključak da se Prijedlog zakona o uposlenicima uputi u daljnju proceduru prema vladi.**

### 3.2. Nacrt Zakona o šumama

Gđa Turkić izvještava o posljednjim informacijama po pitanju Zakona o šumama. Jučer se održao sastanak Parlamentarne komisije za lokalnu samoupravu. Komisija će predložiti da se u roku od 30 dana dva dana prijedloga usaglase. Nije sporno da Parlament mora konsultovati Savez.

G-din Omerović izvještava da ima informaciju da je Prijedlog prošao i da ide u javnu raspravu.

Gđa Turkić predlaže da se Predsjedništvo izjasni po pitanju vlasništva jer Radna grupa se nije opredijelila.

G-din Smajlović smatra da se treba držati prijedloga Radne grupe.

Gđa Travljanin konstatuje da će Stručna služba Saveza opet informisati Predsjedništvo o dešavanjima sa slijedeće sjednice Parlamenta.

**Jednoglasno je usvojen zaključak da Predsjedništvo Saveza prihvata stav Komisije za lokalnu samoupravu Federalnog parlamenta.**

### 3.3. Prijedlog Zakona o izmjenama i dopunama Zakona o organizaciji organa uprave u FBiH

Tačka nije razmatrana što do momenta održavanja sjednice Predsjedništva, Stručnoj službi Saveza nije dostavljeno potrebno mišljenje članova Radne grupe, te će se tačka razmatrati na slijedećoj sjednici Predsjedništva. (op. zapisničara)

### 3.4. Izmjene i dopune Zakona o slobodi pristupa informacijama

Gđa Travljanin izvještava prisutne da će se krajem mjeseca oktobra organizovati javne rasprave u kojima će se uključiti i autori zakona i predstavnici jedinica lokalne samouprave.

G-din Dedić konstatuje da nije zadovoljan i izražava svoje nezadovoljstvo. Traži da se u obzir uzmu prijedlozi amandmana na Zakon koji su konkretni i pripremljeni od strane Općine Jablanica.

**Jednoglasno je usvojen zaključak da Prijedlog izmjena i dopuna ovog Zakona uradi Komisija za ustavna i zakonodavna pitanja zajedno sa predstavnicima Općine Jablanica.**

4. Izvještaj o konstituisanju Komisije za međunarodne veze, saradnju i evropske integracije  
Izjestilac: g-đa Zlata Turkić, viši saradnik za rad sa skupštinskim komisijama i institucijama vlasti

Gđa Travljanin naglašava da je Komisija predložila za predstavnike Saveza na Generalnoj skupštini NALASa, g-dina Begu Birparića i g-dina Ivana Vukadina.

**Izvještaj i prijedlog Komisije je jednoglasno usvojen.**

5. Tekuća pitanja

Gđa Travljanin izvještava prisutne o napretku Projektu «Ustavne reforme – diskusije u lokalnim zajednicama», koju Savez implementira u saradnji sa SDCom, te da će se na narednim sjednicama detaljnije izvijestiti o napretku projekta .

Nakon što su sve tačke Dnevnog reda zaključene, g-din Smajlović zatvara Četvrtu sjednicu Predsjedništva Saveza općina i gradova FBiH.

Zapisničar  
Šejla Hasić, s.r.

Predsjednik Predsjedništva Skupštine  
Husejin Smajlović, s.r.